

瞻六堂集 二卷

湖樓舊藏 癸亥十月十四日重裝 併一册



顧寧人先生曰詩不必人々

皆作稽古賢豪樹德立勳奚



必藉韻語以傳間或性之所

近徃々譜聲成文用以發抒

其忠悃陶寫其天真則雖或

微詞短詠如吉光片羽為世

寶貴又奚必揚鐵岷之十萬
首哉吾埔雙髻山之慧湖寺
為明季銓部庸菴羅公托跡
地憶余少時過遊寺僧之老
者猶能傳述當時孤忠慷慨
轉入枯禪之狀如見駱賓王

祝髮靈隱時越數年 公之

元孫紹度希文兄弟延余司
講事于響葉山房乃獲誦
公瞻六堂詩味其中懷宕逸
格韻蕭閒時於蒼鬱之中流
露哀感又如讀金道隱徧行

堂集顧家經共燹十不存三
每憇憑其裒集成帙付之梓
以垂後又十年希文乃出其
所抄寫者沈宗伯既序其
卷端受而讀之亦足見公
忠悃之發抒天真之陶寫有

不能自己者雖然公之高
風亮節為明季潮海中一人
表章之任自有銀臺金管初
何庸贅余惟深嘉紹度希文
之無忘乃祖相與兩夜燈窓
互相校訂而茲既克成厥志

云乙酉花朝日茶嶺後學饒
堂題



明揭陽羅公貞卿以名進士起家
歷官吏部員外郎思陵召對便殿
問脩練儲備四事敷陳愷切深中
時銀冢宰鄭三俊澄清銓政倚公
以理內艱歸里甲申聞變將散家
財報國不果南渡後徵拜都察院



右副都御史馬阮用事辭不就職
雅好為詩凡出處之際身世之感
無不寓之篇什其詩真率自矢不
假藻繪和平溫雅冲澹希夷格合
三唐體畫劉白散體之文與摯樸
實不子矜奇炫異固風雅之正宗

也萬曆中公安竟陵矯歷下婁東
之弊倡淺率之調以為浮響造不
根之句以為奇突用助語之辭以
為流轉杳渺幽晦墮入鼠穴鬼國
詩歸一出詞壇無不降心相從聞
聲遙應而公獨以風雅為宗不染

餘習即其詩文亦可謂歇立不阿者矣又聞公滄桑之後披髮慟哭入山日學枯禪絕口不談世事三十年足迹不入城市

國朝收用遺逸是令入山勸駕公答訪有道人只合孤峰頂臥聽康衢

擊壤聲句昔國變後熊給事魚山止於華山寺方簡討密之止於高坐寺金臨清道隱止於丹霞山寺皆遁入緇流以公較之豈非合志同軌者與公歿鄉人謚曰文節先生洵無愧焉

乾隆甲申中秋長洲後學沈德潛
題并書時年九十有二



舊序

陳子於有韻之言本無所諳然從衆中讀之謬相
然贊譬之陸羽不識字坐石上讀書效人口動而
已前序天中石郎詩亦爲此語石郎大哈笑之以
爲陳子之直白如此也陳子在浮梁舟中晤汪函
郎函郎爲汪伯玉大司馬從子素不習時義而善
古文辭得予制舉業大嗟賞予刻怪卿不習此何
以獨賞此然以別友文使之讀則已不解爲何語
矣世之習舉子業者以陳子之文不可句而汪所

不解者乃在彼不在此彼非以時文讀陳子之書以古文讀陳子之書也繇此言之陳子不諳有韻之言至如羅子貞卿之詩則固諳之矣讀之正如讀古人名作古遠澹宕而秀杰之氣往往引人入勝地味之經年未必可盡也然乍接之時一眸而見之洪纖高下雖不省者皆能名其處此爲天材絕優非復流之材之所可樂也陳子之所不能諳者雖坐而言然亦世人之爲詩有以使之然詩如良卿而陳子猶詒人云效人口動而已夫非媒

而誕陳子亦不爲也貞卿年少制義外凡有雜著皆可名家此詩固已見虎一文矣臨川年弟陳際泰題於長安邸中

於制科帖括之外別出一枝而燈傳無盡者唯詩詩者清微窅渺之氣激越以鳴者也熟場濃趣中戛焉得有詩以真詩與真能詩人處熱場濃趣中戛戛乎其不相入矣年友貞卿妙年蚤達游及吏事余十駕弗及而襟情蕭遠頗似之余每見其戟髯抵掌如滕元發扁舟破浪而來軒然聳出至讀其

詩如九臯獨喚深林孤芳異香幽響都不著人間
渣穢笠澤翁評山谷帖謂不應携在長安逆旅中
亦非貴人席帽金絡馬傳呼入省時所觀余於貞
卿詩亦云壬午抄冬年社弟吳本泰書於冰雪居

文節公傳

公諱萬傑字貞卿號庸菴鄉人私謚曰文節先生
其先世譜出豫章宋未有諱安者自閩莆田之官
來粵愛揭之佳山水因卜居焉十餘傳而生公揭
邑諸生鄉賢衍六公第三子也年十八登崇正庚
午舉人甲戌成進士甫釋褐丁外艱服闋改行人
司行人兩奉冊使封吉荆二藩庚辰召對便殿給
筆札問修練儲備四事敷奏無諱深中時艱隨擢
吏部清吏司尋轉員外郎時冢宰鄭三俊力澄銓

傳
政以公正直不阿破格畀以選事公一矢公慎請
託不行任事一年復以內艱歸里值揭邑侵倡境
內殷戶出糶全活甚衆甲申三月變北耗至輒蹙
然起憤不欲生會南都舉號盡廢其家產約同志
勒兵勤王已聞朝政日稗將驕兵悍上下嬉逐無
度乃聲咽氣塞徵拜都察院右副都御史不就散
諸勇健痛哭入山結茅於埔陽之雙髻峰林棲谷
汲日習枯禪時有同里被難諸生祝髮稱語山者
相與酬倡詩歌於烟嵐竹樹中三十年絕口談世
事足不履城市雖家人父子邈如隔世

興朝定鼎海宇廓清簡求遺逸當道爲具薦牘敦勸
出山公有卻聘詩云竹馬迎來冬日溫條風遠拂
隴頭村首陽亦屬周疆里敢道食薇不是恩又云
一掃浮氛今已清幾家鷄犬月中行道人只合孤
峰頂卧聽康衢擊壤聲著作殊多率逸其稿疾革
遺命題碣曰明龍山樵夫之墓以自志其躬丁厄
運忠孝未純云嗟呼攷公以弱冠取科第天才趨
敏操履高潔輒見穎露乃膺國家顛隳而孤忠慷

慨無儒生氣有夙將風視諸偷盜豈不霄壤哉即我

朝底定之日公年方三十許或少抑損以梯榮希寵何求不獲乃復棲心塵外堅卧松雲自比于陶元亮田遊巖之徒非其天性有高人數等者哉揭處南海之僻向未得表章青簡濬于公為孫行且世居埔陽曾拜公山寺辱公教誨今敬述公大畧以備考非敢傳公也康熙癸酉仲春茶陽族孫濬拜述

瞻六堂集總目

詩 共一百九十首

卷上

樂府 一首

君子行

歌 九首

鷓鴣飛客中作

舟過南康望匡廬諸山歌

擬讀曲歌七首

五言古 七首

齋中即事二首

擬古二首

感遇

題公眉畫

金陵留別許班王

七言古 四首

下第南歸夜聞杜鵑偶作

春暮

種柳歌

秋月篇

五言律 三十七首

出塞

擣衣曲

返棹

寓羊城秋懷

登鎮海樓懷古

暮春旅懷

揚州懷古

假山

癸酉春日偶成四首

冒雨登滕王閣

客中聞林石友訃遙哭以詩

邨中懷同社諸友

登友人山閣

懷韓讓之

途中寄王子龍

懷蕭次圭

生日志感

微雨

冬晚

春日郊行四首

冬日即事三首

登黃岐山夜宿僧舍示公詹

同公詹諸子遊南巖

喜王無長至自五羊即席有贈用南巖韻

東平道中早行

雨泊漳樹鎮

癸未元日

贈同學友

幽居

七言律 六十二首

白鶴峰謁蘇文忠公祠

齋中即事

江上落花五首

初入燕京馬上口占

渡淮

采石磯謫仙樓懷古

惆悵詞感舊作

秋日寄蕭次圭

次韻答蕭次圭中秋見懷之作

燕邸漫興五首

金城榕色用邑乘題

玉窖棉陰用邑乘題

公眷兄自閩漳來訪予舊有遊漳之約因
事不果感其遠至賦此爲贈

南巖僧具酒饌邀同公眷及余兄弟輩劇
飲

送別公眷還漳兼訂明春遊期

初春寄羊城王子龍

使舟歸泊金陵遇舊館人以便面索書走

筆賦贈

贈姚茂翼先生

送李葵孺大司農予告歸里

奉題水部王贍齋尊公在吾先生鄉賢名

官冊後

李華嶙以尊公鄉賢冊見示賦此奉贈

署中感事呈吳梅里

零雨步入署中和同寅吳梅里韻

山中答友人二首

以下入山後詩

次韻答郭正夫招同諸公入陶社之作一

首

入山寄諸眷屬

赤城道人與傅由庚居士共訂出世之約

將擬結茅水竹見示緣冊走筆戲題

送友人歸閩

初度日奕株上人以詩見贈次韻奉答

語石菴即事

自坎夏回語石菴磴路崎嶇濟勝無具即

事口占

偕磐湖和尚遊赤水巖

人日陰晦病中同雪樵禪侶作

山中積雪曉起和雪樵韻

雪霽和雪樵韻

送鄭立煌歸潮陽

夏日有感示學者

磐湖秋夕同諸禪侶夜坐

寄答伍鐵山先生二首

寄壽孫戒菴

寓南安寺逢初度日大開上人為拈香慶

讚口占志謝

寄壽黃字河道長

戊申除夕示諸道友

詠溪雲廬為姚孝廉兄弟作

聞黃迂父辭榮歸養寄贈一律

過吳間十旬芳齋即席賦贈

巳酉除夕

庚戌元日

春朝即事

燈夕即事

春日感作

卷下

五言絕句 二十二首

題自畫扇水墨桂花

自畫墨菊贈公眉

古離別三首

贈別

渡淮

五八體夏日偶成

春夜不寐步月偶成回文一首

西來意 以下入山後作

偶題二首

壬辰除夜十首 有引

七言絕句 四十二首

竹枝詞三首

幽燕老將歌

少年行二首

秋興

下第出都呈南歸諸友五首

風雨篇四首 有引

題畫

冬日美人蕉與池畔梅花對植偶作二首

新嘉驛署舊有會稽女子留題三絕悽婉

動人予以戊寅暮春過宿其處則壁間

之句已磨滅不可復識矣感慨之餘仍

和韻弔之

奉使荆回宿萬安僧舍次壁間韻

齊昌邸中送朗澗上人還山

山中答邑令二首 以下山後詩

山居雜詩八首

閱五子山圖寄贈無用上人

贈黃檗山僧

謝客

苦熱病中口占

桃子坪

崎溜下

高岌

和平波道人原韻

六言絕句 十六首

九日

瞻六堂即事十首

偶作 以下入山後作

秋夜坐月偶成四首

文 共十三首

序

族叔某翁八一壽序

敬社序

貞社序

苦竹山房草序

引

修祖祠族譜引

揭庠生謝名選暨妻陳氏妹純玉孝烈合

傳

邱隱君小傳 并贊

優婆夷行清羅八姑小傳

記

重建揭陽縣官署記

疏

募重建磐湖慈雲菴疏

病中禮懺疏

祭文

祭孫戒菴文

祭啟孟姪文

瞻六堂集卷上

明揭陽羅萬傑貞卿甫著

曾孫廷祥校錄

元孫楨侯編輯

正佐刊訂

穎

楨官

楨仁同校刊

樂府一首

君子行

釣不羨惡溪水行不經太行山太行豈無路壯士
多摧顏荆榛非所適窮轍未可攀君子貴居易至
人善閉關

歌九首

鷓鴣飛客中作

鷓鴣飛決起孤洲渚寒汀日暮鳥聲急溪上落花
墜紅雨捲羅衣春草為誰綠蕩子歸未歸

舟過南康遙望匡廬諸山歌

客心渺兮夷猶遲落日兮扁舟臨長江兮極日撫
遲景兮淹留薰風徐至踈雨乍收山光凝翠雲色
含秋伴衆鳥兮孤渚俯夕陽兮中流波婉轉兮汎
汎帆容與兮悠悠悵離魂兮飄飄更低徊而增憂
望匡廬之恍惚欲往從以末由

擬讀曲歌七首

妾似菡萏花隨波上下生郎如荷葉珠蕩漾無定
情

陌上遊冶郎掀簾瞥一見情知不是歡愛他似歡

面

啗郎臂歡莫嗔儂驕儂憨未解事

拭別淚應悔打鴛鴦輸他雙對睡

見說新栽海棠梨開已久賺郎連枝折刺殺郎纖手

欺儂不識字詐作他儂書顛倒試儂意

奈何許感恩與負德不可同日語

五言古 七首

齋中即事二首

披書當對客庶以懲我短焚香當灌菜庶以止我
懶溪光發幽獨柴扉涼氣滿微雨過竹色筍籜於
茲澣亭陰樹影攢堦暝鳥聲緩心靜有餘閒起候
茶煙煖

根躁地易囂巖壑亦吾擾而况人世間足跡滋紛
躑閉門即深山溪煙結幽杳映堦苔色靜壓檻露
氣曉仰看簷前樹桂花香未了感此塵勞心因之
謝歸鳥

擬古二首

明一室集 卷一
妾本若邪女少小名嬌嬈好為蕩舟戲來往浣紗
橋玉釵壓雲鬟繡帶束纖腰十四為君婦羞容未
可挑感君頻寵顧贈妾英瓊瑤願言佩胸臆白首
以逍遙
浮雲西北來蕩子策輕輶借問欲何之鳴鞭向薊
州落日照顏色淒風吹征裘一去萬里途安知經
幾秋飛鳥遶樹間噉噉戀其儔豈無琅玕食念子
不能酬紅顏坐成老空想大刀頭

感遇

青青礪底松倒懸蒼崖壁歲蕤含宿霧獨立無人
側上有烏鵲棲下有驚湍激念茲霜雪深况復暑
寒積勁質久難靡孤根諒不易所嗟匠石稀一顧
三歎息

題公看畫

何處驗天機胸中與腕底蒼蒼莽莽間無謂有至
理島樹若亂煙微茫波際起餘霞散孤村晴光變
遠邇靜者立其傍心魂忽而止

金陵留別許班王

相違動幾載相見未盈旬又復嗟行役何以慰勞
人秣陵風土美首夏如晚春柳外鶯聲碎雨後山
色新子戀秦淮水予逐京洛塵同是天涯客誰辨
出處因臨岐勸子歸悵默不能陳子歸無他好柴
門荷主仁巨觴置我前再酌情已申各自愛光景
毋令遠遊頻

七言古四首

下第南歸夜聞杜鵑偶作

杜鵑晚宿垂楊枝野碧沙明岸草萋天寒月落三
更後哽咽數聲帶雨啼昨夜東風故園裏腸斷江
南浪遊子盡日叮嚀苦別離空有羽毛飛不起

春暮

眼見風光渾欲醉為憐芳艷階前墜逢春能幾不
禁愁曉露滴作花間淚朝來剝却屐齒間蹴遍苔
痕未忍還已教細雨催梅信聊倩輕風洗柳顏池
塘艸色春歸處驚飛粉蝶紛如絮日長回看悄無
人一雙翠羽時來去

種柳歌時余擬以首夏北上

此生自許隨畚鍤每逢佳卉情若狎何況嫣然煙
雨姿臨春栽時敢後之高低一依徑路轉疎密不
學衆植爲爾憐客子艷陽天子亦嘲爾常愛眠會
看垂陰成美蔭莫問道傍與溪邊長安五月堤色
新青青應逐車前塵掀髯揚袂知何似恍惚見爾
園中身

秋月篇

秋風蕭瑟天氣清萬里無霞月正明初向溪邊搖
素練忽離海嶠傍高城高城索寞涼颼急殘柳叅
差昏鴉集桂樹娟娟影漸橫銀河耿耿光纔入水
晶宮潤玉壺寒雲母屏空碧露濕吹簫樓上鳳皇
棲織錦堂中蟋蟀泣白苧含愁舞袖閒青衫掩淚
琵琶澀霜落星移玉漏深如何對此不傷心生憎
翠被芙蓉帳羞結雙珠玳瑁簪鏡裏孤鸞空照影
曲中別鶴易成音有客還賡蕩子賦無人更續白
頭嗔可憐蟾子墜羅幃可憐蟾影照寒衣與君相
憶還相恨與君同宿不同飛四壁蛩吟生晚怨滿
床蝶夢喚人歸蝶夢蛩吟幾度新起看秋月墜江

濱更吹數韻裂雲笛共訪霓裳天際人

五言律 三十七首

出塞

早出陰山道寒生薊北秋笑驅紫騮馬醉擁白狐
裘漢月明沙磧胡霜冷戍樓男兒重許國未是愛
封侯

擣衣曲

日日高樓上含愁擣舊衾一聲隨去雁萬里急寒
砧此際穿鍼恨他年織錦心不爲征戍婦誰識別
離深

返棹

山晚夕陽沉寒花背棹陰溪光何處澹秋色到門
深不盡杉松影難移鳧鷖心靜聽空外響霖葉欲
盈襟

寓羊城秋懷

獨有狂吟客偏憐秋色高驚風吹薜荔細雨點蒲
桃節序逢搖落浮生漫滯勞秋聽簷外竹終夕響
蕭颺

登鎮海樓懷古

王粲情何切陸公去不回煙光晚翠滴爽氣朝霞
開鳥向雲中過人疑天上來寒山與秋色爭鎖粵
王臺

暮春旅懷

栖栖薊北地冉冉暮春天客路偏茲景相看兩悄
然落花寒食後倦鳥夕陽邊欲辦南歸計惟餘沽
酒錢

揚州懷古

江山幾代謝空憶舊時形潮擁海門白柳依隋苑

青錦帆嗟寂寞翠輦怨颺零日暮棹歌起悽悽不
忍聽

假山

蕭然幾片石翠色共氤氳婉轉一峯出週遮兩岫
分苔深疑積雨日煖欲舒雲晨夕空庭裡煙巒迴
不羣

癸酉春日偶成四首

二十浮生客世情無一知青山供我癖白眼畏人
疑對酒愁先盡彈碁局屢移每因春事促常教夜

眠遲

風元祇剩此一徑亦幽哉老樹帶花媚春潮擁檻
來不情常避客多病爲貪杯隨意露華落空庭綴
綠苔

獨坐晴窻晚閒唵散寂寥鳥聲啼別墅柳色上新
條傲骨本難狎虛名原易搖風塵甘偃蹇薄俗任
喧囂

窮來無一物相伴惟竒書日與簡編近拚將禮法
踈花枝春霽後竹影月明初祇此了閒事清狂不

明六堂集 卷上
羨餘

冒雨登滕王閣

不識洪都府今登第一樓
雨聲微似瀑雲色澹於
穠地以文人重名因帝子
留落霞佳句在捫石欲
生愁

客中聞林石友訃遙哭以詩

倏忽夜臺春一翻存沒頻
乾坤妒韻士頽海失騷
人米老原非僻阮公祇是
真應留青眼在長與石
爲隣

即中懷同社諸友

數載窮交態支離感此身
燕雲迷遠客頽月醉何
人文字揣摩盡素心追琢
頻一燈寒照夢萬里獨
縈神

登友人山閣

一閣陰森外頻生靜者機
磬聲奔竹澗燈影戀柴
扉杖履情相得眠餐事不
違棲尋敦舊約夕露照
微微

懷韓讓之

念子先予去驅馳竟若何懷中片刺盡杖底百錢
多不改青雲志時聞白雪歌江湖饒客思浪迹滯
煙波

途中寄王子龍

乞得一官夫那堪長作儒浮雲燕地斷秋色薊門
孤俠骨猶存劍鳥才欲棄繻平生骯髒態到底不
能無

懷蕭次圭

洛日燕山晚憶君易水深大都常混跡不次論知

音潦倒窮交色悽惶失路心那堪離索後惆悵此

孤唵

生日志感

七尺終何用空驚此日臨強隨人笑語難慰尊慈
心拓落半生廢劬勞百感深秋風殊多惡向晚倍
蕭森

微雨

微雨亦瀟瀟踈窻響寂寥虫聲低近砌樹影暗隨
潮遙檻花相問垂簷靄自招雙童無外事茗粥並

晨宵

冬晚

冬晚似春歸
翛然靜掩扉
澗漸寒更急
盆卉澹相
依
竟日詩篇闕
經旬酒伴稀
未須愁歲暮
簷際宿
餘暉

春日郊行四首

春光行處好
着意看飛花
遇物但能澹
棲心易以
遐
林隨山徑折
溪傍竹煙斜
携得雙柑去
啼鶯尙
可賒

陰晴無定候
蠟屐出柴扉
野樹自喧寂
江雲無是非
鳥衝殘照下
人逐暗芳歸
珍重一溪水
灣灣送
落暉

禽魚心不隔
靜得氣機先
感茲昆蟲性
因知造化
權
鷄豚村社酒
杖履草堂煙
郭北春山近
茲遊亦
曠然

不是尋僧去
便因看竹還
泠泠當戶月
淡淡隔溪
山
洛水誰同戲
和風自解顏
北窻歸卧足
已是羲
皇間

冬日即事三首

嶺外雖無雪經冬亦可憐寒艷依古樹霜隼掠孤
煙未暇攤書坐只愁擁褐眠空階響敗葉遮莫曉
風天

閒算今冬事蹉跎似汎瀾人情窮後悟歲月病中
看凍屋梅魂老荒齋竹影殘瀟瀟一夜雨破衲倍
增寒

索莫空齋裡愁多廢寢興霏霏拂檻霧颯颯受風
燈節近臘邊樹人如定後僧淒然一榻內形影淡
相憑

登黃岐山夜宿僧舍示公省

臥對纔茲夕深心冥見聞禪燈一室靜月影半山
分夾樹迷青靄疎鐘咽白雲瀟瀟窻外竹幽夢易
紛紜

同公省諸子遊南巖

不可無茲遊危巖趣漸幽濤聲寒及夜樹色老宜
秋幻眼因高換閒踪借景酬勝朋殊解事竟日恣
淹留

喜王無長至自五羊即席有贈用南巖韻
相逢問久遊懷抱亦能幽踪跡吳還越旅程春復
秋羅峰供靜對珠海藉深酬愁絕仲宣賦羈棲未
可留

東平道中早行

帶露桃千樹含煙柳半堤林光散遠近野色潤高
低薄宦同鷄肋浮生信馬蹄朦朧殘月影客思易
淒淒

雨泊樟樹鎮

苦雨滯行舟江村信宿留市燈明岸際漁罟倚竿
頭樹色迷歸夢灘聲响旅愁回看青濕處千里暮
煙浮

癸未元日

多病逢元日憂時歎逝年徒聞寬大詔不熄豕狼
烟世事干戈裏生涯藥餌前艱危無一補腸斷蓼
莪篇

贈同學友

共憶對床約相忘歲月高風塵雙短劍雨雪一綈

袍戎馬今方盛乾坤莫可逃九重宵旰切執戟慎
言勞

幽居

幽居似遠林一往覺情深鳥去花猶落風來松自
唵澹雲高士志孤月野僧心爲愛蕭疎景移樽對
夕陰

七言律

六十二首

白鶴峰謔蘇文忠祠

峰前鶴去曉霞收逐客行踪不可留一代奇才淪
玉局三年春夢醉羅浮南樓初日浮金暈北戶長
江舞砌流一盞寒泉心欲薦蠻煙野菊未經秋

齋中即事

幽齋無事似山家寂寂柴扉閉晚霞夜靜敲燈時
讀史月明燒竹自煎茶呢喃屋上一雙燕舌噪池
邊兩部蛙怪得長能消永晝焚香掃地間栽花

江上落花五首

風吹萬點樹頭稀
日日危樓送夕暉
解道幽懷伴月冷
忽驚離恨共雲飛
煙開古岸翻殘雪
燕落空庭濺舞衣
爲報故園新雨後
隔谿啼鳥喚人歸
東風原自妒妖嬌
醉壓瓊枝漫寂寥
乍暖乍寒魂漠漠
疑狂疑怯影搖搖
情高已逐遊人去
夢短那堪過客招
回首江城欲暝色
夕陽何處聽吹簫
滿江煙雨冷淒淒
萬紫千紅踏作泥
殘醉重扶湘水北
春風直到灞陵西
半鈎明月鶯聲碎
一派斜陽燕語低
最是懷人多黯別
朝來陌上手分携
夢裏扁舟欲曙天
五更風雨對愁眠
芳心搖落驚前夜
弱質淒涼憶昔年
錦織秦川紅拂水
歌殘梁苑綠鋪煙
幽香冷艷知何似
多在滄洲淺渚邊
憐香惜粉不勝悲
拋擲於今定幾時
深院和風飄玉屑
長門細雨墜胭脂
崔徽對鏡嗟容改
杜牧尋春悵去遲
贏得江頭送別淚
相隨缺月挂殘枝

初入燕京馬上口占

帝城宮闕隱蓬萊
此際遙瞻曙色開
弔古應憐擊

筑淚狂歌獨愧揆天才西山爽氣千層出碣石晴
雲萬里來聞道 聖朝多市駿黃金依舊滿燕臺

渡淮

淮水東流碧影光風吹細雨雜花香一溪柳絮飛
輕雪兩岸鶯聲碎夕陽蘄北浮雲時極目江南春
色總縈腸醉來恍惚真成夢留取鄉心問客航

采石磯謫仙樓懷古

不見磯頭烏夜啼仙樓風景苦淒淒雲移晚雨當
窻入霧宿春江擁檻齊有客空唵青玉案無人更

醉白銅鞮登臨不盡古今感矯首寒山日欲西

惆悵詞感舊作

淒風瑟瑟落花多惆悵東流長逝波祇恨雲寒迷
洛浦爭知月暗阻銀河清聲誰寫竹枝怨白苧空
傳子夜歌莫道朱顏零落甚當時魂夢已蹉跎

秋日寄蕭次圭

淅瀝秋聲不可聞松間月際更思君相逢海內誰
青眼憶別都門對白雲菊徑雨疎侵草色練江風
急漲潮紋遙知兩地淒涼甚羨爾清真能迴羣

次韻答蕭次圭中秋見懷之作

霜擁丹楓落滿城
溪星耿耿一燈明
懷人慘澹逢
瓠月對酒踈狂憶
晚晴遠樹欲遮銀
漢色淒風忽
斷玉簫聲知君正有登樓興
不淺應同此夕情

燕邸漫興五首

無才原不敢言狂
博得踈慵事事忘
面口可憎隨
衆誚腰肢作惡趨
人忙註來稗乘添
諧史簡去肘
經試睡方舊業今緣都莫問
輸他鷗鳥住寒塘
笑從馬足問馳驅
拓落人閒舊酒徒
萬里雄心悲

劍戟幾年混跡憶
江湖憂時漫許屠
龍手玩世真
回捋虎鬚莫道宦情三不可
風塵猶自恕狂夫
回首鄉園意獨違
那教着盡舊征衣
野花妖嬈分
千種堤柳長成盡
十圍白眼生涯貧
與病烏紗公
案是耶非閒身漫擬鳧
和鶴拚與人間說瘦肥
書生陋習喜談文
酒障詩魔兩不分
甘與歡場作
佐貳敢邀詞陣喚
將軍顛名在我元
從衆癖性於
人豈入羣未息勞
肩心早冷卻驚世
法密紛紛
五年踪跡半奔波
偃蹇風塵容易過
眼見交游零

落盡心知世事覆翻多謀身拙比居巢鳥迂俗癡
如撲火蛾磬典春衫償酒債貪他醉貌幾回醜

金城榕色用邑乘題

鬱蔥喬樹傍城隈黛色霜根翠幾迴別有孤姿凌
雪霰猶餘老幹伴苔莓懸梢日影遙參漢韻葉風
聲欲撼雷最是炎州垂蔭久清陰好並召棠推

玉窖棉陰用邑乘題

千珠不省人間有移向玉溪種最珍柯並古松迷
曉日影隨流水亂寒蘋菁蔥乍覺炊煙繞披拂時

經細雨勻海國蟠根多歲月天陰潮落見龍鱗

公看兄自閩漳來訪予舊有遊漳之約因事

不果感其遠至賦此爲贈

笑我經旬憚險巉感君茲至徑茅茨携來霞頰雲

千片散作榕江畫一匹

公看善畫

童稚喜迎新杖履溪

山應老舊巾衫青樽白眼真癡絕誰識風流老阿

咸

南巖僧具酒饌邀同公看及余兄弟輩劇飲
幾從快友向山登忙卻招邀好事僧豫約此身隨

兩屐解將何物論三乘危峯孤磬聽來杳落日炊
煙望裏凝取醉不妨觴迭換眼中賸有酒如澗

送別公眉還漳兼訂明春遊期

匹馬輕舸此日纔朔風雁影共徘徊無端別緒悲
長鋏不盡孤棕對短盃一路剛逢霜月冷到家應
值臘梅開憑君記取韓山道春色明年擬再陪

初春寄羊城王子龍

幾心良朋憶好音懷君折盡索居心虛名嶺海仍
高卧薄祿風塵祇醉吟望入層雲魂欲黯神馳千
里月同深春來處處蓬蒿滿蠟屐無因得共尋

使舟歸泊金陵遇舊館人以便面索書走筆

賦贈

五年不見中常憶一別於今經幾期我已居然髯
似戟君胡能不鬢如絲三山雲物成今昔六代煙
花異歲時屈指江帆歸去路空令客思易淒其

贈姚茂翼先生

仲兄外父時學元門

每從揮麈挹元襟遠韻高懷不可尋出世法因住
世得窮交情以素交深微言闡處關天地靜理參

時見古今笑我踈狂尚喜獵藉君好作頂門鍼
送李葵孺大司農予告歸里

供帳都門話別情欣逢疏傅出西京燕臺日麗乘
輶色槐省風高曳履聲碩德清時推主計殊恩華
髮許辭榮從茲南海頻回望紫氣遙瞻照鳳城

奉題水部王騰齋尊公在吾先生鄉賢名宦

冊後

先生早扣性天扁志在春秋行孝經鳧舄解飛霞
嶺雨熊幡長映惠湖星瞽宗兩地雲封紫碑碣千

秋史篆青四十餘年天可必三槐不負德符銘

李華燐以尊公鄉賢冊見示賦此奉贈

瑤華早歲擅名場裾曳王門鬢已蒼自以典型當
諫草不將詞賦擬長楊青氈故物伊人在絳帳談
經弟子行元笈五千應不忝蘭臺柱史續遺芳

署中感事呈吳梅里

遠愧糠粃前列居勞薪何幸借吹噓萍飄作客八
千里瓠落爲郎一載餘自覺剛腸妨故事羞將冷
眼溷除書風雷亦感生成德敢悵清時雨露踈

零雨步入署中和同寅吳梅里韻

曉步天街氣盡晴依依宮柳逐人行屯雲不灑塵
車煖烈日爭驅汗騎迎 聖主有心虔六責遺黎
無計緩三征懸知圭璧饒元格此際雲霓望匪輕

山中答友人二首 以下入山後作

廿載相依弟與兄重追往事倍關情文章有氣天
難喪混沌無權日易傾獨把金篦刮翳影羞隨瓦
缶協同聲空山自古饒蘭蕙何事汀洲採杜衡
故園松菊近如何三徑依然擬再過芳草迷離啼

鳥歌晚山漱灑夕陽多千秋姓並江東隱一綫騷

留厓北歌為問滄溟垂釣者羊裘久矣換漁簑

次韻答郭正夫招同諸公入陶社之作二首

柴桑日月剩遺民手擘江離泣累臣白社那邀採
藥客青門舊識種瓜人一身費許登山屐萬事悲
餘漉酒巾豈是攢眉違夙約祇妨無處問漁津
虎溪三笑羨同時把臂深林好在茲擬續宗雷高
士步肯違嵇阮素交期天寒鶴怨橋邊語夜靜猿
呼澤畔詞一卧峰頭鷺景換青袍白馬不勝悲

入山寄諸眷屬

幾年塵土混衣冠
火宅棲遲夢已闌
破釜昔曾聞項籍
携鎗今竊效陳搏
孤踪冷比飛鴻爪
去志迅如落澗湍
從此黃岐峰頂月
清宵應各照團圓

赤城道人與傅由庚居士共訂出世之約將
擬結茅水竹見示緣冊走筆戲題

道人行履愛風流
荆棘林中著絮裘
一帶水光渠是我
幾竿竹影獨耶儔
但將雲壑爲扁鐻
肯信蓬茅是贅疣
了事嘗推傅大士
解言空手把鋤頭

送友人歸閩

兩載粵鄉識者稀
雄心耗盡掩荆扉
郊寒島瘦皆詩品
何肉周妻悉道機
嶺樹頻遮遊子眼
溪光亂點旅人衣
送君此際情無限
小艇灘頭帶雨飛

初度日奕株禪師以詩見贈次韻奉答

四十年來夢幻身
幾迴驚看二毛新
青山無恙解尋主
白社有師期卜隣
入室秋風寒露骨
照床夜月遠含神
誰知枯木巖前路
突出一枝劫外春

語石菴即事

華門閒寂倩雲封十載林泉不負公透海穿山憑
柳栗填溝塞壑任榛蓬梅依石壁留初月竹近茅
簷納晚風料得菴前一線路幾人脚底訂圓通

自坎夏回語石庵磴路崎嶇濟勝無具即事

口占

崎嶇磴道傍雲斜望入層崖勢轉賒伴我行藏筇
七尺與誰來往徑三义煙光澹蕩聞啼鳥樹影扶
疎見落花上得嶺頭足指痛卻疑身是老元沙

偕磐湖和尚遊赤水巖

携筇選勝到欽岑幾片雲封苔徑深花發寒巖飄
異馥鳥啼空谷逗清音忘機自愛青峰遠息影偏
宜碧樹森赤水元珠誰拾得卻教象罔細追尋

人日陰晦病中同雪樵禪侶作

卧病祇園冬復春衝寒雨雪謾盈旬山光澹泊和
煙瘦樹色龍葱帶霧新剪勝無勞詢舊俗扶藜猶
自負閒身百年天地空回首佳節徒驚日是人

山中積雪曉起和雪樵韻

隱几蕭條丈室南閉門活計舊嘗諳祇疑曉月偏

禁冷無那春風解放
愁夢入冰壺
魂易悄
歌回雪曲
興同酣
蒙頭衲被團團
裏鼻息如雷
信飽參

雪霽和雪樵韻

雲收雪霽曉烟平
重疊蒼巒玉削成
曉日初開巖樹影
微風忽瀉澗泉聲
映階草色千層碧
入戶波光一片明
藜杖負春知幾度
跣趺對客倍關情

送鄭立煌歸潮陽

幽懷不憚道途艱
踏遍蓬蒿帶笑還
一室晤歌和水月
百年事業倚雲山
撥塵未肯追仙釋
尋樂親

曾探孔顏慙愧我
宗無語句賺君千里叩元關

夏日有感示學者

褊穢何曾恕老顛
維摩斗室病年年
貪嗔已去癡仍在
情想無多識尚纏
詩板酒槍新業障
梅妻鶴子舊因緣
空餘一枕齁齁夢
從此思叅沒眼禪

磐湖秋夕同諸禪侶夜坐

露下空山客思驚
殘荷新菊迭衰榮
池邊宿鳥搖花影
竹裏流泉雜磬聲
是夕逢秋偏澹灑
何人對月不淒清
爐香茗椀供深坐
一室蕭然稱野情

寄答伍鐵山先生二首

千里同風事若何元沙白紙轉請訛交親散後身
猶累筆硯焚餘懶未過只被鹿裘歸谷口難隨鴻
翩出巖阿憑君莫舉舊時話又教新亭淚眼多
佛祖儒宗世盡然我於兩者總無緣但宜安分老
農圃免致污塗古聖賢海內故遊枕子上山中生
計鑿頭邊道人瞠目層霄外一任滄桑日變遷

寄壽孫戒菴

蘓門隱者嗜林泉一嘯鸞音許孰傳靜裡生涯資
竹樹閒中經濟課雲煙刀圭藥熟追思邈法磬緣
深踵道元世出世間無不可龍湖今得比桃川

寓南安寺逢初度日大開上人爲拈香慶讚

口占志謝

顛毛種種四旬餘閱世終悲歲月虛鏡裏空花呈
起滅眼前流水悟乘除謾誇丁令千年鶴且趁楊
岐三脚驢博得蒲團香半炷多君滴水沁芙蓉

寄壽黃字河道長

成佛生天誰後先幻人同種幻因緣羨君九日當

初度遲我二旬作少年幸有黃花供晚醉不妨白
髮傲時賢問竒競索題糕字笑挈青筇凌紫煙

戊申除夕示諸道友

空驚華髮逐年陳又遇寒巖一度春屋角梅花香
入座尊前栢葉味宜人
家風好共安冷澹歲月何
須判舊新楮杻滿爐消永夜夢魂不到鱣江濱

詠溪雲廬爲姚孝廉兄弟作

白雲堆裏數峰陰翠竹蒼松繞澗潄卜築剛栽棣
萼樹幽棲時費蓼莪吟溪山結侶情偏摯岵岵興
思感獨深誓墓終偕兄弟隱採芝不負九原心

聞黃迂父辭榮歸養寄贈一律

聞道飄然賦遂初歸來子舍樂何如日穿南牖問
安後春護北堂視膳餘自有菜衣供色笑不將菽
水換簪裾相逢莫訝休官早正值慈闈健起居

過吳間卜翁芳齋即席賦贈

間十爲孝廉墀
之子能文好客

幽居端不負斯堂看劍啣杯引興長舊業傳家惟
尚炮華文照世篋先光圖書以外他無物庭戶之
間別有香便擬卜隣傍此地偏因邱壑性難忘

已酉除夕

老來漸覺萬緣輕
帟帳布衾夢易成
雨泚爐煙蒸永夜
風搖燭影嫋深更
流光暗逐閒中過
華髮俱從愁裏生
擬待明朝天氣煖
探梅山壑杖藜行

庚戌元日

山林別是一家春
野老忘機歲月頻
細雨輕風新節物
寬衣博帶舊時人
桃花迎露開偏早
竹葉輕霜釀獨醇
笑挈胡床傍樹影
卧看巖色翠嶙峋

春朝即事

翠筠深處綠陰寒
鳥語喧喧近藥欄
落盡梅花春氣早
焚餘芋火曉煙殘
憤成楚曲沉湘怨
羞把楞嚴面壁看
老病經年事事懶
呼童唯訊竹平安

燈夕即事

冷落園扉晚不關
茗煙迴出竹林間
煨殘黃獨僧初定
踏遍青苔客未還
燈影終嫌霜月澹
花枝應怯冷風頑
每嫌村鼓連宵鬧
不許山齋夢獨閒

春日感作

梅花落盡滿荒園
曉看簷前積雨痕
暖氣不生枯

木葉春風空到竹籬門息心終自依禪侶謂雪樵和尚

避地還須洽隱淪指磐湖痛哭太平耕種日夜來鷄

犬靜無喧

瞻六堂集卷上終

瞻六堂集卷下

明揭陽羅萬傑貞卿甫著

曾孫廷祥校錄

元孫楨侯編輯

正佐刊訂

穎

楨信

楨仁同校刊

五言絕句 二十二首

題自畫扇水墨桂花

傲骨秋來瘦幽香月裡生
嫣然重一笑不肯作傾城

自畫墨菊贈公睂

欹斜高士影憔悴騷人魄
不受衆欣憐遠神先得

古離別三首

送別垂楊下淚沾樹上花
曉風吹不盡飄泊到天涯

天涯忽已遠日暮心如焚
盼望空階下寒山隔彩雲

綵雲撩亂飛去作相思
夢覺來縈妾腸閒把玉簫弄

贈別

大秦明月珠絕寶世間無
開匣持相贈照君錦襪璣

渡淮

浮雲嶺外色落日旅中心
辛苦問淮水客愁孰淺

深

五仄體夏日偶成

暑氣入嫩柳落日吹翠竹獨卧北牖下待得荔子熟

春夜不寐步月偶成回文一首

心 簾捲風花落徑遮露草深巖更催短夢皎月對閒

西來意 以下入山後作

雲來竹影暗雨過松聲涼若問西來意溪深杓柄

長

偶題二首

生計巖前樹素交雲外山愁來天地老醉去古今

閒

蕉 心對寒灰死形同槁葉凋鷄談共柳粟蝶夢付團

壬辰除夜 有引

歲行盡矣空山闐寂四十忽過學道無成
偶讀子美守歲詩云四十明朝過飛騰暮

景斜不覺惻然因用爲韻成詩十絕

折肱已更三立壁惟餘一副光皮囊逢場且作戲

蚤年漫學數不識五和十挾策問君平噬臍悔莫及

冷落茅簷下殘缸剔半明梅花瘦比我窻外影交橫

生死同醒睡亦如夕復朝須知根本地原不屬消

短髮颯風吹盛年逝水過古今夢幾迴靜眼忽窺

破

蟄鱗盡屈伏倦翮自低飛嵐氣晚來重呼童掩竹

扉

候火夜鐺煖松風數沸騰茶煙輕裊裊迴出白雲層

徘徊苔徑深徙倚林光暮爆竹響空山棲禽驚不度

卧雲枕澗流跂石陰踈景清磬數聲中悠然發深

省

夜靜燈花落天寒香篆斜齋廚缺芝朮金甌任塵

沙

七言絕句

四十二首

竹枝詞三首

木蘭花映木蘭舟花自妖嬌水自流貪看堤間楊

柳色不知舟落小灘頭

小姬釀酒喚人嘗玉盃擎來撲鼻香門前五尺垂

絲柳繫盡江南年少腸

輕紈五丈細如絺剪就單衫著地垂江濱日暖渾

無事火伴相邀賭荔枝

幽燕老將歌

曾共嫖姚擒可汗至今刀暗血猶丹壯心不逐年
華盡夜夜旄頭拂劍看

少年行二首

陌上如煙俠少遊金鑣駿馬白狐裘鳴鞭轉入柳
堤去無數楊花撲紫騮

春風同醉酒家胡據坐狂歌意氣麤拋卻酒錢不
用數臨行猶自盼當壚

秋興

一瓢濁酒竹床邊潦倒狂夫長自憐醉卧不知秋
色盡西風憔悴菊花天

下第出都呈南歸諸友五首

燕山落日盼歸程臺上千金弔郭卿自是君王憐
駿骨駑駘何敢濫時名

敝却貂裘耐却塵春風回首易沾巾囊中賸有酒
錢在羞說當年問舌人

長鋏驅馳日色沈一樽對影倍蕭森憑將燕市和
歌淚灑到陵陽石裏心

征鞍無處不飛沙漸覺林光散晚霞去去燕雲携

卷六
六
滿袖行行頰月落誰家

夾道輕烟暖拍堤春山障眼客魂迷野花不及垂

楊色並與茸茸綴馬蹄

風雨篇四首 有引

平未被放南歸舟中阻風雨者累日偶讀

東坡彭城詩風雨蕭蕭已斷魂之句因憶

幼時與家仲氏聯床風雨之夕悵然有感

遂成四絕題曰風雨篇

楊花飛盡散孤村遠客歸思勞夢魂欹枕自憐春

色晚滿江風雨一燈昏

風吹暮雨透輕寒落日扁舟繫未安遙想故園春

草色祇今猶作夢中看

風自蕭颺雨自愁望來雲氣每疑秋登臨畏向高

原去恐有鶴鴿在上頭

江風陣陣雨霏霏滿目浮雲白日微尚憶聯床舊

有約不知茲夕願先違

題畫

朱顏華髮是耶非芒履無心野鹿肥我亦從來耽

酒興借君筇杖醉扶歸

冬日美人蕉與池畔梅花對植偶作二首

怯寒貪睡意遲遲
掩映疎櫺影若私
肯與老梅爲近侍
呼他名字綠衣兒

綠鬟朱靨自爲春
粧罷從教曉露嗔
一夕寒飈連夕雨
可憐憔悴捧心人

新嘉驛署舊有會稽女子留題三絕悽婉動人
予以戊寅暮春過宿其處則壁間之句已磨滅不可復識矣感慨之餘仍和韻弔之

可是芳心化作塵
那能頻憶夢中身
生憎繡幙花間蝶
不逐東風戀暮春

不須絕調與同遊
薄命終憐恨已悠
可惜堦前今夜月
無人空自上簾鉤

墨迹歌殘知爲誰
未成短韻先成悲
數聲啼鴉怨芳艸
不是閨人亦淚垂

奉使荆回宿萬安僧舍次壁間韻

征衣猶帶洞庭沙
閱盡殘冬未見家
野寺寒燈獨

卧處關心一夜到梅花

齊昌邸中送朗潤上人還山

離亭草色正芳菲
落日斜陽把客衣
回首故山杳
靄外斷雲應傍錫聲飛

山中答邑令二首

以下入山後作

竹馬迎來冬日溫
條風遠拂隴頭村
首陽亦屬周
疆里敢道食薇不是恩

一掃浮氛今已清
几家鷄犬月中行
道人只合孤
峯頂卧聽康衢擊壤聲

山居禱詩八首

嗟峨石筍倚雲栽
樵徑無人任野苔
最愛東峰明
月色夜深斜入板扉來

冷落柴扉晚不扃
爨煙遙映夕嵐青
芒鞋轉入茅
岡去折得梅花插膽瓶

杖藜望入晚煙空
碧巘蒼巖指顧中
短後應隨拾
栗老長歌不數採芝翁

手植梅花近百株
青山從此變芬敷
兔葵燕麥渾
無賴搖蕩春風總讓渠

欲沽村釀餉山樵短樹槎枒暫掛瓢習懶愈成枯
寐僻經旬不赴野人招

漫將生計託長鏡總被時人笑老憨造物亦憐客
衲薄嚴霜飛不到茅菴

荒岡草色入秋殘帶露松聲徹夜寒獨坐擁衾無
一事挑燈簡取佛經看

半鈎斜月掛巖屏香篆初殘夢已醒橫按一枝無
孔笛峰前吹與石人聽

閱五子山圖寄贈無用上人

邈得層峰結勝緣青山似欲勸枯禪他時了卻芒
鞋債襪被來尋絕頂眠

贈黃檗山僧

小縛團蕉竹澗邊此心何事不悠然貪他清味耐
他苦黃檗山中住十年

謝客

白雲堆裏數峰深謝時人撥草尋便欲出頭來
合伴恐違當口住山心

苦熱病中口占

溽暑何曾寬病翁汗衫脫却引清風山間自有納
涼處燒藥爐頭火正紅

桃子坪

無數桃花傍嶺生茅簷低與白雲平樵歌轉入深
林裏忽亂塔前流水聲

崎溜下

尋幽不憚徑途艱行到水窮雲起山一帶梨花聞
犬吠人家近在翠微間

高岌

絕頂平天一線通野僧耕鑿白雲中解衣稍憇松
林晚萬疊亂山夕照紅

和平波道人原韻

碧水青山指點中秋光澹處暮雲濃平擔柳標千
峰去極目滄波感慨同

六言絕句 十六首

九日

梧葉無風亦落菊花帶雨猶開那堪此日憔悴更被笛聲吹來

瞻六堂即事十首

一間陋室容膝幾種幽花愜衷此是痴人雅福問誰清夢能同

往跡悠悠幾許浮生攘攘何心無邊樹色遠近不盡溪流淺深

顛須從衆呼應熱不因人轉移此意非關傲俗由
來癖性難醫

灌園不是逃世荷插堪稱達生喧寂都饒至理醉
醒各具深情

香焚一室宜靜月到中庭漸幽蝶夢初生榻上鶯
聲忽過枝頭

清宵靜几相對落日茅簷自閒知己何如濁酒素
交那似青山

有樹偏宜水映無花不傍欄開香殘偶值僧去茗

款恰逢客來

閱物一雙醒眼藏身數卷奇書休言世事蕉鹿輸
與神僊蠹魚

低棋屢倖先着拙飲常推後乾說甚正襟危坐贏
他袖手旁觀

一門以內師友十畝之間軸邁講易先求麗澤讀
詩欲廢蓼莪

偶作 以下入山後作

坡公借地種菜龐老携家入山休把古人比我同

床夢不相關

秋夜坐月偶成四首

爐煙細細浮几花影離離搖窻過眼浮雲一點照襟明月干江

常依木石習靜頗愛禽魚與偕勺水幽涵雅趣青山澹入高懷

兀坐蒲團一個啜餘茗粥七甌竹色偏宜靜夜松聲最喜清秋

託曠觀以適性聊縱目而怡顏閒隨罔兩酬答動與太虛往還

瞻六堂文集賸稿

文 共十三首

族叔某翁八一壽序

商飈報爽皎露凝輝樵子方墜戶習禪寂忽聞剝
啄聲則吾宗人踵門請曰維茲仲秋之望爲吾族
叔某翁八一覽揆之辰諸子姓謀乞一言以佐觴
祝君將何以命之予曰至敬無文父黨無容夫東
海巨棗西池蟠桃卮言無當非吾儕所宜侈陳尊
長之前者也且余杜口毘邪久矣無已則資諸君

為禪謀予獲與寓目焉將擇其質而近情者以獻於是為翁之昆弟行者若而人首颺言曰天地醇龐貞固之氣其被於庶類也每視其所受之器以為予故注焉而不滿酌焉而不竭者其所受之量過於所與之數也翁慷慨樸直與物無競晚歲身遭喪亂間關險難而任運安命不傷性不滑和則所受與人殊也所受與人殊則天所以予之者亦與人異循是而躋期頤登上壽猶掇之也八袞何足多焉是翁之所以壽者其得諸天者厚也敢以

為翁祝既而為翁之子行者告而人次賡言曰根

壯者葉茂源濬者流長一也一寸之萌

蔓草壓之牛羊踐之自拱一也抱經幾十百

寒燠而後干霄拂雲亭一也岷嶓之脈

始發也蠕蠕焉爾其濫觴於一也而放乎湖海經

幾十百滌洄而後涵湧澎湃一也天浴日觀者嘆望

洋焉翁大父某公名儒宿學一也某公隱德遐齡世

載其休翁躬稟燕翼步趨言動先軌是師故古優

游暮景耳目聰明精神健王豈蒲柳之姿溝澮之

流可並哉是翁之所以壽者其得諸先世之澤者深也敢以為翁祝又繼而為翁之孫行者若而人三頌言曰凡物疾速者易盡而遲鈍者可久惟人亦然翁早歲艱嗣年近半百始得子某遲矣乃今有孫三蘭玉繞膝當翁倦勤之日某膂力方剛操持家秉曲當翁意則遲之效也某攻業不就藜藿布褐銕六乃其事親也甘毳滌瀝備物致養不以貧賤為懈視富貴而有親不逮事與事之不盡其歡者大逕庭矣以祿養何如以善養則鈍之效也是翁之所以壽者其得諸子孫之承順者尤至也敢以為翁祝語既樵子肅容起拜曰三言者質而近情美莫加焉予無能為東里子產矣遂述其詞以佐觴

敬社序

傳曰敬德之聚也能敬必有德夫子以善交許晏
平仲而稱久而敬之則敬也者乃交友中第一義
也君子無不敬也敬身為大則友也者吾人之第
二身也能敬則為真身為大身為天地倚賴之身
為萬劫不壞之身不能敬則為渺身為幻身為垢
穢叢集之身為露電速化之身可不慎與當知敬
之一字上接危微精一之傳下逮濂洛關閩莫不
凜為師保奉若著龜吾黨為學靜而操存動而省

察內不放逸外絕狎侮與夫持躬淑世忠君愛親
無非此物此志而敬業樂羣親師益友又其餘也
晚近風偷性命之朋絕聞世利之交迭興翻雲覆
雨靡不鮮終所謂披肝瀝胆仗義執言者祇以便
其私也而一二憤世嫉俗者流褰裳高舉如獐獨
跳生峻龍門死弔青蠅則復往往少出門之功失
他山之助究且與比匪逐臭之倫同類共義袁石
公云古今只四倫大抵缺朋友信斯言也則易演
麗澤詩咏嚶鳴皆爲迂談而管鮑雷陳之鬼不幾
擲揄人於地下耶故今日而有士焉敦篤行誼砥
礪名譽講世好於壇坫聯異姓爲壘篋亦猶行古
之道也太上道德其次文藝總之不離乎敬邑諸
友訂文會之盟以敬名社予長子基升與焉因爲
弁其端以詔之若此

貞社序

今天下綦重朋友矣顧友之爲道以人合者也君
父兄以天合者也以天合者易以睚以人合者易
以睚故從來聲氣之場可掖而成亦可靡而敗非
深心篤行之士風雨鷄鳴干馬相詔烏能致攻錯
之益而召和平之聽哉傳曰不信乎友弗獲乎上
精神者拜獻之羔鴈也積精斂神以答筐旨之求
者比肩事主之所願也援桴以鼓不若萬竅之怒
號也桔槔以漑不若衆澍之沾濡也精神動於下

則泰交見於上天人參半焉古之人稱善交者不一有以異為同者如范文正之於尹師魯是也有以嚴為寬者如諸葛武侯之於法孝直是也有以疎為密者如劉元城之於司馬溫公是也有以糾為薦者如歐陽文忠之於包孝肅是也總之先國家而後身名急公義而緩私交其趨一也其或立意見矜氣魄爭門戶護局面始焉齟齬於同人究且貽憂於君父不亦羞朝廷而見誚於冥行獨往之夫耶邑中孝廉某諸君訂會以貞為名問序於予惟貞之義居乾德之終於四時為冬於五行為土於五常為信信也者論交善物也諸君異日或籍金閨或膺民社階地既殊事勢亦別要以始終不渝顯晦靡忒切磋觀型期收穫上信友之效庶無負於命名之意云爾

苦竹山房草序

趙子幼文哀其所著詩文若干卷題曰苦竹山房
草託予猶孫轉示予且以序言見屬予覘北舊業
久已遯荒烏敢謬相然贊以重予過第聞幼文爲
人專親孝處友恭高義薄雲錦心映日其至性綽
有過人處發而爲詩歌古文辭真篤古澹淹貫典
雅時而煙雲澄霽時而雨雪霏微時而紳笏雍容
時而笳鼓淒冽要以抒寫其胸中之誠然而發揮
乎性情之所不容已非乞靈風華借粧月露者所

能窺測其涯涉也。幼文之詩文，幼文之至性，爲之也。予壯歲罹難，落髮空山，鏟跡銷聲，謝絕塵世者三十餘年。於茲矣，不知幼文何所聞見，而跡我於山舍間，執禮甚卑。時值予他出，竟不獲面與盡，而歸歸時，聞猶喃喃道中，不置也。豈以予雖髦猶足以語斐然之業乎？抑別有所取乎？予以爲文章一道，可以鑄金石而泣鬼神，針芥水乳，往往不謀而合。其聲光氣誼，固已卓立於六通四闢之途，而孤行於尋常行墨之外，非苟焉而已也。以幼文之積學，偉才，歷覽竒勝，當必有灑然於懷抱間者，不盡洩不止也。異日者，出其吉光片羽於以黼黻廊廟，鼓吹休明，庶幾覲面遇之。又何孜孜然索予枯槁寂寞之言，以弁首簡耶？夫序三都者，不足以重三都，而三都之賦自足爲人世所取。重則予雖無言可也。

修祖祠族譜引

祖祠自庚子年重建即有吉祥善事起而應之如
孝廉明經茂才班班輩出而賦額丁口豐贏繁衍
倍增於舊謂非祖靈之庇曷臻此哉但草昧經營
功虧一篲及今不修將歲月滋久風雨飄搖且棟
折榱崩患貽几筵不亦墮前功而恫先靈耶於是
族諸父咸詔不肖力倡是舉以爲宗人先不肖義
何敢辭惟願各懷水木之思用申涓滴之助急續
前修而整飭之母俾宮墻荆榛香煙淒斷至今人

過而指之曰此牛圈豕柙耳以重吾族人不孝之
罪則幸甚矣至族譜之修業已百年邇因兵燹舊
牒無存今則向子孫以詢其祖考諱字且有茫然
不能應者久之而支分派別或有莫辨其長幼之
序等殺之誼者矣親睦之道莫此爲先是尤所當
繼修祠而舉者也不肖雖老無用願樂觀厥成焉
是爲引

揭庠生謝名選暨妻陳氏妹純玉孝烈合傳
揭邑庠生謝名選字欽甫潮陽之玉路鄉人也少
能文負氣節余嘗器之其父士英爲郡學生學淵
源而教有義方患濱海寇侵因僑居於揭母李氏
素諳經史內一季秋山寇告警母慮將及難遂抱
石沉河名選號慟拯救既甦母歷舉往昔名媛處
變不辱芳規耿耿惟期一死且曰此際之死死賢
於生及寇至邑破母命名選逃名選不忍去旣而
闔室被拘母謂名選妻陳氏及女純玉曰宜速自

盡毋緩須臾致貽後恨陳氏亟棄兒於地猛偕投
繯賊覺奔至以及割其繩母及陳氏俱絕惟純玉
尚餘喘息齒嚙舌舌斷亦死嗚呼微特母賢女媳
俱迴出尋常萬萬矣賊迫名選負三屍自城下名
選痛哭籲天願死作厲鬼以褫賊魄賊初入營憤
名選之阻其兆也露刃喝之曰爾家有烈婦汝亦
將為俠男子乎名選罵益厲賊怒刺腹及頸而死
一門之內四難同時聞者無不皆裂父士英與猶
子上選重着為賊分繫別營聞其家以孝烈死亦
遂義而釋之嗚呼取義成仁雖甚非類猶有感焉
既而賊果為他寇併戮真有若名選之手誅者尤
竒母以殘索之餘置屍城下絕而復蘇會數老嫗
見而問之偽為乞者挾與俱歸月餘始至其鄉偁
諸艱辛克全身名每隱隱似有陰扶謂非名選而
何名選死後猶聞能來人間嘗見於鐵陽逆旅言
貌慷慨如生選信人傑沒亦雄耳邑僧海德將聚
賊所殺人屍以塋欽陳氏與純玉之守義而死也
為殮其屍而特掩之亂稍定引其父收之時冰輝

已三圓矣啟殯則貞容如生玉質無損嗚呼此誠
所謂浩然長存不依形而立不隨死而亡者與余
雖鏟跡茶山已不與人間得失惟於忠孝大節不
能默然况名選尤余之向所心識而器重者耶懼
亂而或失其姓氏也亟傳次之以俟後之觀人風
者焉

論曰嗚呼甲申之變 先帝身殉社稷爾時忠臣
義士或在廷慷慨罵賊或疆場齒劍如歸或逃
絕世入山蹈海莫不忠義奮發志節較然以故極

標於上而化逮於下膠庠之彥巾幗之英爲子死
孝爲婦死節者不一而足使天下萬世知綱常名
教之重有不容以一息泯沒者得非 祖宗尊賢
敬士之報與噫觀名選之就義純玉之自戕雖古
人之握拳透爪啣齒穿齧者又何加焉

邱隱君小傳

并贊

有芥函上人者閩之永定人也妙齡出家留心祖道自閩來謁磐湖和尚每以已躬下事昕夕咨叩殆無虛時予亦竊他山之益焉一日忽來告別云某甲擬以某日回籍為先嚴襄大事且出其父用我公行實一紙長跪予前而請曰願賜一言以俾不朽予辭不獲乃展讀其狀君姓邱氏諱某用我其別號也素行質直夙為鄉黨所稱少年力學未竟厥志事二人以孝聞尤精岐黃術家藏藥劑遇

病者輒以施之竟弗索值所活老幼無算與厥配
齊眉偕老有冀缺梁鴻之遺風焉生子五人皆英
特雋發予固不識隱君然觀上人操行恬樸居恒
恂恂不妄言笑則所以道其父者可諗知其非誇
也噫審若是是亦可以傳也已乃爲之贊曰

世道弱喪斷樸漓醇不有典型古處曷敦宛彼
龍崗皤然一老砥行肅躬履道自考幼攻舉業
數竒弗售美富內藏厥積彌厚夙興夜寐以事
二人溫清定省必躬必親修之於家其則不遠

至孝橫塞宗黨視眴晚精難經國手著譽家蓄
刀圭濟人無數帝歆厥德將大其門錫以蕃胤
裕及後昆振振家駒寶桂荀龍後來之秀跨金
亢宗多有白眉厭塵世相篤志出家矢報鞠養
一念精誠卽達九京矧伊至性能間幽冥必然
玄扃一笑而起不知其父請視其子

優婆夷行清羅八姑小傳

予往考烈女傳至魯陶嬰事誦黃鵠之歌悼所遇
之不幸未嘗不涕簌簌下也迨閱傳燈錄見所載
秦國夫人等具見地密圓機鋒敏捷有老師者宿
所不及而貞操大節反似以禪學掩者始知兩儀
清泚之氣特間鍾於婦人女子而世所共詫以為
不幸者固造物之所以為大幸者也晚近風靡羞
稱節義若乃茹荼焦蓼遺世出塵此在血性奇男
子猶難之况厚望於閨閻弱質耶予於吾族女羅

八姑見其八矣按姑生於大埔縣湖寮鄉大父宏
所公以明經起家教諭世有令德家範夙敦姑幼
稟遺訓素嫻姆儀年十八適同鄉憲副及泉黃公
曾孫一潛為妻十九歲夫歿姑哀毀盡禮矢志守
節服闋慮家人之將奪其志也遂屏却筭飾蔬食
持戒願投空門值里人木陳和尚母賴氏出家為
比丘尼乃往依之承事精勤服勞無怠不啻師徒
而母子焉木陳師既嗣法天童歸里省親欽姑峻
節為安法名曰行清表特操也姑又捐脫簪珥創

慈雲菴於黃氏祖居側祀大士像偕其同志優婆
夷數十人朝夕焚修龕火經聲常徹晝夜殆將舉
五十餘年所閱一切榮枯順逆悲歡得喪盡付水
泡空花惟一句伽陀提撕勿懈而予於是益以為
姑之操行實有出於尋常耳目之外者以恒情論
姑妙齡失天煢煢靡依非誓堅金石鮮不搖念而
艱貞備嘗有人世所不堪者人孰不為姑難而姑
特處之裕如若不知有孀嫠之苦即黃羅兩姓父
兄弟卒未聞以姑之苦節上諸當道勒之貞珉

者豈亦習見姑安恬順適樂天知命以爲固然而不自覺耶今歲三月予行脚至湖寮以諸父行見姑於靜室覩其被服質素秉性慈和已諗知其爲蓮花座上人而冰雪清操則尤足令人讚嘆景仰耳昔曹大家以孀婦續漢史出入宮壺皇后貴人請事爲師而衡陽龐蘊深悟禪宗數與丹霞趙州諸尊宿酬答辯難饒有至理此皆彤史紀爲佳話以姑方之可謂兼有其美者矣予故闡而出之以俟採風者擇焉且以續傳燈之後跋云爾

重建揭陽縣官署記

國家設官分職綏乂兆人畿郡州邑星羅碁布莫不有崇墉邃宇宅中嚮明以敷政治所以示有尊也而傳舍其官者輒視其地爲遽廬高者託言靜鎮循茅土之舊安坐待遷卑卑者流且借營繕名目克彼私囊政日靡而俗日敝故觀治署之修廢而政事之得失可知已我揭邑僻處海澨昔稱樂國際鼎革後屢罹寇變乙未秋賊艘壓城大肆焚劫延及縣署悉爲煨燼嗣是邑長皆僦屋以棲庫

陋湫隘無以表壯麗而肅瞻聽十餘年間令數更甚者獲譴以去青烏家咸追咎於中宮邱墟致蹈斯患或倡改圖輒復苦於物力蕭索以爲時詘舉羸獨奈何以此而厲我黔首爲則又缺然中止迨我晉水張侯以仁心敏才來涖茲土提孱植仆百廢俱舉念治所之荒榛慨然以興復爲己任進諸縉紳父老相與策畫其事衆聞歡應如同一口爰請當道而報可焉乃於某年月鳩工庀材諏日經始不動公帑不責贖鍰而庶民子來爭輸恐後木

石土甃不脛而馳磨集於堦下閱數月而前堂後寢以洎廊廡門譙庖湍之屬次第落成予於是益信王道之可爲而至誠者之動物速也方事之始基也不以爲道傍之築則以爲無米之炊議不必行行不必成成不必亟乃竟從劫灰秦火之餘頓覩鳥革翬飛之盛都人士嘖嘖嘆異以爲天造地設神輸鬼運而成豈非張侯恩德入人之深故無煩智籠術馭而上作下應捷若桴鼓者乎矧由此而輪奐鼎新氣運休明士習振興民風丕變張侯

之功尤有大於是者耶余剝跡巖谷世事俱廢樂
聞張侯之能以王道牖我民也遂不辭固陋而爲
之記

募重建磐湖慈雲菴疏

紫雲白氣幻出法派橫枝枯木寒巖燒殺釘椿浴
漢閒人酬之福地勝果假以良因磐湖慈雲菴者
舊爲黃氏別業而優婆夷行清道人特捐貲售之
更爲梵室以祀普門大士金像者也指出古佛插
草而成寶剎劈破青山布金已建精藍獨獠村中
快睹龍象蹴踏狐兔窟裏突聞獅子嘖呻可謂克
紹臺山之規繩親承補巖之記蒞矣於是浮巖樵
子過而慕焉踢倒淨瓶不怕石頭路滑展開鋤子

明一室集 卷一
那管洞口雲封就深公以買山做遠師而結社橫
擔柳栗覓鷓鴣之遺巢小縛團蕉溫蝴蝶之舊夢
坐孤峯頂上抹月批風向磐湖波心拏雲燮浪一
雙赤手化現妙喜之宮十笏蝸廬滿敷燈王之座
剡堂前之草蔦透老衲元機合浮屠之尖端藉檀
那鼎力抖擻形山之寶揭露衣領之珠捨虎邱之
千間幸續王珣芳躅擲湘流之萬貫共羨龐蘊高
風一簣終能覆山泥九請以封谷急須巨靈神斧
乞解盧至慳囊

病中禮懺疏

伏以業緣本成空衆生迷幻影以成妄相罪性無
所往諸佛示方便而開懺門譬浣垢衣於淨波衣
便鮮潔如移瘠樹於沃土樹益敷榮欲洗曠天劫
冤今憑不思議力伏念某久違覺海深逐迷流几
十載馳驚紛華之場百千生停滯穢濁之地如渴
鹿之赴陽發倏東倏西同共龜之處於泥頭出頭
沒在家在鄉在國尠一善之足稱負若負親負師
真九死之莫贖長恨染塵太早自嗟入道已遲疾

病連年空餘瘦骨挨床褥憂患卒歲剝有顛毛耐
雪霜蓋造業者身身在則業縛而緣生者念念續
而生存似薪火之遞傳等水波之不息苟弗本諸
真諦則染心者不磨或不滅此妄緣則後報者常
在伏茲清淨大衆恭宣懺摩明文稽首投誠無求
不應至心皈命有叩斯通若父母之怒逆兒賴憐
叟曲爲勸解猶化工之刊朽木藉場師重加栽培
吹暖律於寒灰回陽春於幽谷敢冀法輪常轉竚
看慧日普輝報德祇拈五分香滌愆惟資三昧水
伏祈災屯咸遣孽障悉除三業自此純和六根即
時清淨永斷愚痴眩惑盡祛夢幻空華願豎精進
幢被息辱鎧作宗門之貳師誓同頻加烏附婆竭
龍充梵刹之下隸

祭孫戒菴文

士不幸而生哀俗值亂世乃能知幾識微潔身高
蹈茹芝拾橡鹿豕爲羣蟬蛻污泥之中矚然不滓
跡雖近放而心則逾苦噫亦綦難矣惟我戒菴沉
姿厚質慧性淵衷童子時岍然自異弱冠與予同
遊泮才名籍甚予每遜弗如顧棘戰屢蹶回翔膠
庠中十有餘年迨壬午始捷鄉闈公車北上中途
聞京師戒嚴會場改期遂回軫南邁嗣是而國運
滄桑家園蕩析固已絕意進取邱壑自怡築一畝

之宮長齋佛前日與山僧野叟焚修功課樹藝種
植耳絕輪蹄之音目鮮紛華之色若將終身焉予
嘗有詩壽翁云靜裏生涯資竹樹閒中經濟課雲
煙蓋實錄也翁每過余山中輒留數晨夕劇談闊
論皆世外事未嘗置榮枯得喪於齒頰間也今春
小女于歸於翁之長郎予聞翁動定躩躑殊甚爲
之色喜不意雲輶遄迅蚤迎翁歸安養矣嗚呼痛
哉自喪亂來士大夫惛於驚飈震霆之交加站脚
不定從風而靡比比然也孰能誓墓劇名葢光藏

采作泉石膏肓乎予皇皇求友得翁一人志同道
合以爲末後一段有所倚仗獲脫塵韉凡鎖而今
已矣嗟乎世之人徒見翁隱居獨善淡泊盟心僅
目之爲高人爲清士而不知翁忠君愛國之誠悲
天憫人之感蘊結於中而偶發紆於長林豐草之
間嶽嶠歷落之際也故以逃禪佞佛當蒼梧鼎湖
之悲以鐘魚梵唄當黍離麥秀之謠以衲子田夫
當新亭對泣之侶其一段隱衷苦志翁自知之而
不欲人知之予亦心喻之而不欲對翁明言之而

今始向翁一述之若夫世運之平陂家貲之盈虧
子孫之賢愚功名之顯晦壽世之延促如浮雲春
夢轉盼成空翁已能了死生忘人我矣予亦何必
以種種俗諦嘵嘵然更相慰藉而混化者之聽哉

祭啟孟姪文

嗚呼君已矣吾族之所厚期於君者亦已矣憶乙
酉秋里氛肆毒吾族幾隕君以英偉竒杰之姿夙
負澄清之志乃委身幕府投筆從戎間關阻險卧
革枕戈積勞八載卒能剪滅強讐光復故土是君
之大有造於族也嗣是之後君築堡下壩予避地
茶陽相去數百里間或聚首深談即以殘孽未靖
患切剝膚欲使一方蒙衽席之安須令門庭絕叢
棘之礙壯懷銳氣詡詡然見於眉宇詞色間雖予

老憊龍鍾之人搃其神采亦爲之振聳焉今春山
寇告警勢且蔓延君奉軍符奮不顧身深入賊壘
悞中奸計遂及於難予初聞變而疑旣而驚終而
號痛積寃淚盡而繼之以血也噫君已矣君之德
澤在宗族聲譽在鄉閭勲伐在朝廷固不容以汶
汶又有三丈夫子皆岐嶷穎秀頭角崢嶸各具食
牛之氣異時必能續父未竟之業且人誰無死懦
夫稚子憂勞疾病呻吟床褥沾沾作兒女態無常
催促如落湯螃蟹手忙脚亂孰與夫扶首陷膺轟
轟烈烈爲國殤厲鬼縱死猶聞俠骨香也大丈夫
寧爲玉碎勿爲瓦全君亦可貽笑泉壤所恨者櫬
槍未掃井里邱墟兵寇交訐鄉族騷然出師未捷
身先死常使英雄淚滿襟是予之旣爲君恨者而
又以爲我族人恨也人耶天耶數耶偶耶夫孰爲
之而使至於此也予且奈之何哉嗚呼魂兮歸來
其尚能駕雲車以戾止而鑒予茲一觴者乎

贈六堂集卷下終

先高祖文節先生以崇正甲戌進士任吏垣
政方以憂家居聞寇犯燕京 莊烈帝殉社稷
輒毀家約同志募兵勤國及事不果慟哭入深
山以緇素終其身嗚呼 公之孤忠大節而居
嶺海僻壤固仰望於當世館閣 鉅公表章青
簡至其所遺計遭屯蹇者垂三十年凡有撰著
以兵燹轉徙放逸不全且麥秀之嗟多隣哀楚
先君子在日每痛大德之未揚常督伯子搜
集校讎梓以垂後又緣宦轍屢遷未竟所願乃

不數年而父兄皆捐館舍嗟予小子何敢諉
忘去秋過吳門親賚以質諸歸愚沈宗伯得
蒙訂可謂當亟梓以俟表揚忠節者而紹渠弟
素有同心襄我綿力由是始克踵先君子無
忘先德之志亦以罄予挈瓶之智得兢兢於勿
敢失墜但書梓成而父兄皆不及見一撫遺
編輒唏噓感泣又有不知涕泗之所從來者矣
時乙酉夏五月元孫正佐拜手謹識

